

Kiku un Mama Frustrá por Hasi?

Debí na e situashon turbulento ku nos komunidad ta hañ'é aden, diferente bos ta resoná, retando mayornan pa tuma nan responsabilidat na serio. Nan ta enfatisá ku edukashon ta kuminsá na kas, ku mayornan mester dediká tempu pa nan yunan, ku mester siñá nan balornan, ku materialismo di parti di mayornan ta un opstakulo grandí pa realisá esaki.

Nos ta aploudí esnan ku ta trese esaki dilanti. Ma palabranan no ta basta. Si mayornan no ta aktua pa korigí e frakaso aki, nos ta keda mésun leu.

Tin un paso konkreto ku hopi mayor por tuma, un paso ku lo duna nan mas tempu na kas pa nan por eduká nan yunan i siña nan balornan. Pa kolmo e tambe ta paralisá nan materialismo. Nèt p'esei hopi mayor lo nenga bebe e remedi. Kiku ta e solushon surgerí? Mamanan por keda kas na lugá di bai traha.

Antes, pastornan so a prediká esaki. Beibel ta instruí mamanan pa "gobèrná kas" i "pèrkurá pa nan kas" (1 Timoteo 5:14; Tito 2:5). Ma awor, spesialistanan i sikólogonan ta lamta fo'i soño, dokumentando e impakto negativo ku yunan ta sufri ora e mama ta traha pafó di kas. Segun Dr. Barrie Brazelton, un famoso especialista di mucha, un mama ku ta plania pa bai traha bèk poko tempu despues di duna lus, ta prepará su mes emoshonalmente (inkonsientemente) pa esei asta promé ku e beibi ta nase. E beibi ta sinti e distansiamentu emoshonal.

Ta fásil pa deklará ku mamanan mester keda kas ku nan yunan. Ma hopi mama frustrá ku lágrima ta bisa ku nan ta deseá di keda kas ku nan yunan, ma no por pa motibu di nan sirkunstansianan. Kisas el a haña yu sin kasa, a divorσιά, ta biúda hóben, esposo no tin trabou, èts. Tin manera ku un mama asina por dediká mas tempu pa su yunan? Si! Tin vários opshon ku ta pèrmití e mama pa invert mas tempu na kas mientras e tin un entrada. Nota algun pusibilidat.

Promé ku nos ta mensioná algun alternativa, nos tin ku skarp ònderstand di nos lista. Maske empleo por ta e ruta mas difisil, e diligensia ta un ehèmpel positivo pa e yunan. Palabra di Dios tambe ta masha kategoriko riba e punto aki: "si un hende no ke traha..e no kome tampoko (2 Tesalonisensenan 3:10).

Dos salario ta pèrmití e famia biba riba un nivel ekonómiko komfortabel. Ma tempu ku yunan ta muchu mas importante ku salario. Un paso konkreto ku algun pareha por tuma ta pa e esposa kita di trabou i e famia siña biba di e salario di e esposo so. Talbes esaki lo no ta fásil. E famia lo mester sakrifiká pa biba riba un nivel ekonómiko mas abou...ma e yunan lo benefisiá!

Tin famia ku por lamta un negoshi na kas mes. Kisas bo tin un abilidad spesial. Bo por kose, kushiná, traha obra di man, bo tin un produkto ku bo por bende, bo por hasi trabou di kompiùter na kas, bo por proveé un servisio, èts. Esaki no ta un solushon pa tur hende. Di bèrdat, e por ta frustrante i eksigí hopi tempu. Lo tin momentu ku tantu e yunan komo e kliente ta demandá atenshon pareu.

Un idea kreativo ta ku dos hende muhé por kompartí e mésun trabou. Un ta traha mainta, i e otro ta traha atardi; òf kada un ta traha kada salta dia. Di e forma aki tin un entrada minimal pa e famia i tambe e mama tin mas tempu na kas. Doñonan di trabou ta kuminsá aseptá e idea aki pasobra esnan ku ta traha "part-time" ta mas entusiasamá pa ku nan trabou i kasi semper ta presentá, nan ta mas fit i ménos frustrá ku e mama ku mester traha henter siman i tambe hasi tur e trabou di kas. Segun estadistika, nan ta hasi mas trabou den ménos tempu. Debí ku tur dos dama ta traha "part-time," nan tin ménos benefisio ku e empleado ku ta traha tempu completo, i p'esei ta ménos gastu pa e doño di trabou. Pues, e doño di trabou ta haña mas trabou pa ménos sèn!

Dios a dunábo e yunan ku bo tin. Bo tin un chèns so pa eduká nan na un forma korekto. Si bo ta drispidí e oportunitat, talbes luchando pa haña sèn pa kuida bo famia, bo no ta haña otro chèns. Bo yu tin mas mester di ABO ku e tin mester di bo sèn! Bo por kita di bo trabou, i un otro hende lo yena bo puesto mañan. Ma si bo ta negleshá bo yunan, ningun otro pèrsona por remplasábo!